

წინამდებარე ხელშეკრულება წარმოადგენს შპს “ენ ბი სი”-სა და მომხმარებელს შორის გაფორმებული შეთანხმების არსებით და განუყოფელ ნაწილს. შეთანხმებაზე ხელმოწერით მომხმარებელი ავტომატურად აცხადებს თანხმობას ქვემოთ მოცემული ხელშეკრულების პირობებზე.

## ხელშეკრულება

### “ენ ბი სი”-ს მიერ საგადახდო მომსახურების განწესის თაობაზე

ხელშეკრულების მხარეები:

*ერთი მხრივ, შპს “ენ ბი სი” (შემდგომში “პროვაიდერი”) - საქართველოს კანონმდებლობის შესაბამისად შექმნილი და მოქმედი კომპანია, საიდენტიფიკაციო ნომრით 405150063 და*

*მეორე მხრივ, ფიზიკური პირი, რომელმაც სურვილი გამოთქვა, მიიღოს პროვაიდერის საგადახდო მომსახურება და, რომელმაც გააფორმა საგადახდო მომსახურების მიღების თაობაზე შეთანხმება პროვაიდერთან (შემდგომში “მომხმარებელი”),*

ერთად წოდებულნი, როგორც “**მხარეები**”, აფორმებენ წინამდებარე ხელშეკრულებას “ენ ბი სი”-ს მიერ საგადახდო მომსახურების განწესის თაობაზე (შემდგომში “**ხელშეკრულება**”) და თანხმდებიან ქვემოთ მოცემულ სახელშეკრულებო პირობებზე.

### ინფორმაცია პროვაიდერის შესახებ

მომხმარებელი აცხადებს, რომ ხელშეკრულების ხელმოწერამდე, დეტალურად გაეცნო და გაიაზრა პროვაიდერთან დაკავშირებული შემდეგი ინფორმაცია:

- (1) პროვაიდერი წარმოადგენს საქართველოს ეროვნული ბანკის მიერ რეგისტრირებულ საგადახდო მომსახურების პროვაიდერს რეგისტრაციის ნომრით 0053 – 9004. პროვაიდერი საქმიანობას ახორციელებს “საგადახდო სისტემისა და საგადახდო მომსახურების შესახებ” საქართველოს კანონის, საქართველოს ეროვნული ბანკის მიერ გამოცემული კანონქვემდებარე აქტებისასა და საქართველოს კანონმდებლობის სხვა ნორმატიული აქტების შესაბამისად;
- (2) საქართველოს ეროვნული ბანკი წარმოადგენს პროვაიდერის საზედამხედველო ორგანოს, რომლის ვებ-გვერდის მისამართია: [www.nbg.gov.ge](http://www.nbg.gov.ge) . პროვაიდერის საზედამხედველო ორგანო - საქართველოს ეროვნული ბანკი, არცერთ შემთხვევაში არ არის პასუხისმგებელი პროვაიდერის მიერ მომხმარებლის წინაშე ნაკისრი ვალდებულებების შეუსრულებლობაზე ან არაჯეროვან შესრულებაზე;
- (3) პროვაიდერის ოფიციალური ვებ-გვერდის მისამართია [www.nbs.ge](http://www.nbs.ge) (შემდგომში “**პროვაიდერის ვებ-გვერდი**”), სადაც განთავსებულია პროვაიდერის სათაო ოფისის მისამართი, პროვაიდერის ელექტრონული ფოსტის მისამართი, ტელეფონის ნომერი, ფილიალების მისამართები და სხვა ინფორმაცია, რაც მნიშვნელოვანია მხარეთა შორის სახელშეკრულებო ურთიერთობის პროცესში.

## 1. ხელშეკრულების საგანი

- 1.1. ამ ხელშეკრულებით და მხარეებს შორის გაფორმებული შეთანხმებით (შემდგომში “**შეთანხმება**”) პროვაიდერი იღებს ვალდებულებას, გაუხსნას მომხმარებელს ელექტრონული საფულის ანგარიში და გაუწიოს მას აღნიშნულ ანგარიშთან დაკავშირებული საგადახდო მომსახურება (შემდგომში “**მომსახურება**”).

## 2. ელექტრონული საფულე

- 2.1. ელექტრონული საფულე წარმოადგენს მომხმარებლის სახელზე რეგისტრირებულ ელექტრონული ფულის ანგარიშს, რომელიც იძლევა ელექტრონული ფულის გამოყენების საშუალებას ამ ხელშეკრულებით განსაზღვრული ფორმით.
- 2.2. ელექტრონული საფულე არ წარმოადგენს საბანკო ანგარიშს.
- 2.3. ელექტრონული საფულე ეკუთვნის მხოლოდ მომხმარებელს. დაუშვებელია ელექტრონული საფულის გასხვისება, გადაფორმება ან დაგირავება.
- 2.4. ელექტრონული საფულე რეგისტრირდება უვადოდ.
- 2.5. ელექტრონულ საფულეს გააჩნია ელექტრონული ფულის ანგარიში მინიმუმ ერთ ვალუტაში და ყველა შემთხვევაში - ლარში. ელექტრონულ საფულეს შესაძლოა დაემატოს ანგარიშები სხვადასხვა უცხოურ ვალუტაში.
- 2.6. ელექტრონულ საფულეში არსებული ელექტრონული ფული წარმოადგენს პროვაიდერის მიერ მომხმარებლისგან მიღებული ფულადი სახსრების ნომინალურ და ექვივალენტ ღირებულებას, რომელიც შენახულია ელექტრონულ საფულეში და, რომელსაც მომხმარებელი ინახავს, ანაღდებს ან იყენებს ამ ხელშეკრულებით განსაზღვრული წესით.
- 2.7. ელექტრონულ საფულეში არსებული ელექტრონული ფული არ წარმოადგენს პროვაიდერთან განთავსებულ დეპოზიტს და მას არ ერიცხება სარგებელი ან პროცენტი.
- 2.8. ელექტრონული ფული ელექტრონულ საფულეში განთავსდება მუდმივად, მომხმარებლის მიერ აღნიშნული ელექტრონული ფულის განაღდებად ან განკარგვამდე.

### 3. ელექტრონული საფულის ანგარიშზე თანხის შეტანა

- 3.1. მომხმარებელს შეუძლია თავისი ელექტრონული საფულის ანგარიშზე თანხა შეიტანოს რამდენიმე მეთოდით, მათ შორის, სხვა პროვაიდერის სწრაფი ჩარიცხვის აპარატის მეშვეობით, ელექტრონულ საფულეზე მიბმული საბანკო პლასტიკური ბარათით, ასევე სხვა საშუალებით, რომელსაც პროვაიდერი ხელმისაწვდომს გახდის მომხმარებლისთვის. პროვაიდერს უფლება აქვს, ნებისმიერ დროს გააუქმოს ან დაამატოს ელექტრონული საფულის ანგარიშზე თანხის შეტანის მეთოდები. ინფორმაცია ელექტრონული საფულის ბალანსის შევსების მეთოდების თაობაზე ხელმისაწვდომი იქნება პროვაიდერის ვებ-გვერდზე. ცვლილებების შემთხვევაში, ინფორმაცია განახლდება.

### 4. მომსახურების პირობები

- 4.1. მომსახურების განვების მიზნით, პროვაიდერი მომხმარებელს ინდივიდუალურად გამოუყოფს და გადასცემს ე.წ. “უსახელო” ლოკალურ საბანკო პლასტიკურ ბარათს (შემდგომში “**მომხმარებლის პლასტიკური ბარათი**”) და აღნიშნული ბარათის მონაცემებით დაარეგისტრირებს მომხმარებელს პროვაიდერის ვებ-გვერდზე. რეგისტრაციის შედეგად მომხმარებლის სახელზე შეიქმნება მომხმარებლის პლასტიკურ ბარათზე მიბმული ელექტრონული საფულე (შემდგომში “**ელექტრონული საფულე**”). მომხმარებელს ელექტრონული საფულის მართვის პანელთან წვდომა შეუძლია პროვაიდერის ვებ-გვერდიდან. პროვაიდერმა შესაძლოა შეიმუშავოს მობილური აპლიკაცია, რომლითაც მომხმარებელი ასევე შეძლებს თავის ელექტრონულ საფულესთან წვდომასა და შესაბამისი ფუნქციონალის გამოყენებას. ინფორმაცია ასეთი მობილური აპლიკაციის არსებობისა და მისი გადმოტვირთვის ლინკის შესახებ მოცემული იქნება პროვაიდერის ვებ-გვერდზე.
- 4.2. მომხმარებელს უფლება აქვს:
  - 4.2.1. ელექტრონული საფულის ანგარიშზე შეინახოს თანხა განუსაზღვრელი ვადით;
  - 4.2.2. მომხმარებლის პლასტიკური ბარათის მეშვეობით გაანაღდოს ელექტრონული საფულის ბალანსზე არსებული თანხები საქართველოს ტერიტორიაზე განთავსებული ცალკეული

კომერციული ბანკების ATM ბანკომატიდან (პროვაიდერის ვებ-გვერდზე განთავსდება ინფორმაცია იმ კომერციული ბანკების შესახებ, რომელთა ATM ბანკომატებიდან მომხმარებელი შეძლებს თანხის განაღდებას), ან;

4.2.3. მომხმარებლის პლასტიკური ბარათის მეშვეობით, ელექტრონული საფულის ბალანსზე არსებული თანხების ფარგლებში, განახორციელოს საქონლის ან მომსახურების ღირებულების გადახდა სავაჭრო ობიექტში, სადაც გადახდების მიღებისთვის იყენებენ იმ კომერციული ბანკების POS ტერმინალებს, რომელთა თაობაზე ინფორმაცია განთავსებულია პროვაიდერის ვებ-გვერდზე.

4.3. მომხმარებლის პლასტიკური ბარათის მეშვეობით თანხის განაღდება ან/და ხარჯვა შესაძლოა დაექვემდებაროს გარკვეულ ლიმიტებს, რომლის თაობაზე ინფორმაცია ხელმისაწვდომი იქნება პროვაიდერის ვებ-გვერდზე.

## 5. საკომისიო

5.1. ინფორმაცია ყველა სახის საკომისიოს შესახებ, რომელიც დადგენილია პროვაიდერის სისტემაში მომსახურების მიღებისთვის ან მასთან დაკავშირებით, განთავსებულია პროვაიდერის ვებ-გვერდზე.

## 6. ბარათის დაბლოკვა/შეჩერება

6.1. პროვაიდერს უფლება აქვს ნებისმიერ დროს დაბლოკოს/შეაჩეროს ელექტრონული საფულე და მომხმარებლის პლასტიკური ბარათით სარგებლობა, თუ:

6.1.1. გონივრული ეჭვის საფუძველზე ჩათვლის, რომ მომხმარებელი საგადახდო მომსახურებასა და მომხმარებლის პლასტიკური ბარათით სარგებლობას ახორციელებს უკანონო შემოსავლის ლეგალიზაციის მიზნით;

6.1.2. აღმოაჩენს, რომ ხელშეკრულების გაფორმებამდე არასათანადოდ განხორციელებდა მომხმარებლის იდენტიფიკაციას;

6.1.3. აღმოაჩენს, რომ მომხმარებელი ცდილობს გაანაღდოს ან გახარჯოს ელექტრონული საფულის ანგარიშზე სისტემური ხარვეზის შედეგად გაჩენილი არასანქცირებული თანხა, რომელიც მას არ ეკუთვნის, ან

6.1.4. მომხმარებლის ელექტრონული საფულის ანგარიში და მომხმარებლის პლასტიკური ბარათი არააქტიურია 1 (ერთი) წლის განმავლობაში.

## 7. მომხმარებლის პლასტიკურ ბარათთან დაკავშირებული მხარეთა ვალდებულებები

7.1. მომხმარებელი ვალდებულია:

7.1.1. გამოიყენოს მომხმარებლის პლასტიკური ბარათი ამ ხელშეკრულებით დადგენილი პირობების შესაბამისად;

7.1.2. დაიცვას მისთვის გაცემული მომხმარებლის პლასტიკური ბარათის უსაფრთხოების ზომები, უზრუნველყოს ამ ინსტრუმენტის პერსონიფიცირებული საშუალებების დაცვა;

7.1.3. მომხმარებლის პლასტიკური ბარათის დაკარგვის, მოპარვის, უკანონო მითვისების ან უკანონო გამოყენების ფაქტის აღმოჩენის შემთხვევაში მისი აღმოჩენიდან უმოკლეს ვადაში შეატყობინოს ამის თაობაზე პროვაიდერს ცხელ ხაზზე (რაც მითითებულია პროვაიდერის ვებ-გვერდზე).

7.2. პროვაიდერი ვალდებულია:

7.2.1. მიიღოს ყველა შესაძლო ზომა მომხმარებლის პლასტიკური ბარათის დაცულობისა და მისი არამართლზომიერი გამოყენების თავიდან აცილების უზრუნველსაყოფად;

- 7.2.2. არ გახადოს მომხმარებლის პლასტიკური ბარათის პერსონიფიცირებული უსაფრთხოების მახასიათებლები და საშუალებები ხელმისაწვდომი სხვა პირებისათვის, გარდა ამ თავად მომხმარებლისა;
- 7.2.3. ნათლად გააცნოს მომხმარებელს მომხმარებლის პლასტიკური ბარათის უსაფრთხოების მოთხოვნები;
- 7.2.4. უზრუნველყოს მომხმარებლისგან 7.1.3 მუხლით განსაზღვრული შეტყობინების ნებისმიერ დროს მიღება უშუალოდ მომხმარებლისგან ან მის მიერ წინასწარ განსაზღვრული პირისგან. მომხმარებლის მოთხოვნის შემთხვევაში, პროვაიდერი ვალდებულია მიანოდოს მას შეტყობინების მიღების დასტური, თუ შეტყობინების მიღებიდან გასული არ არის 18 თვეზე მეტი;
- 7.2.5. მომხმარებლისგან 7.1.3 მუხლით განსაზღვრული შეტყობინების მიღებისთანავე, დაუყოვნებლივ უზრუნველყოს მომხმარებლის პლასტიკური ბარათის შემდგომი გამოყენების აღკვეთა.
- 7.3. პროვაიდერი საკუთარ თავზე იღებს მომხმარებლის პლასტიკური ბარათის ან/და მისი პერსონიფიცირებული უსაფრთხოების მახასიათებლებისა და საშუალებების გაგზავნასთან დაკავშირებულ ყველა რისკს.
- 7.4. პროვაიდერი პასუხს არ აგებს მის მიერ შეთავაზებულ უსაფრთხოების ზომებზე მომხმარებლის მიერ უარის თქმის შემთხვევაში დამდგარი შედეგისთვის. ასეთ შემთხვევაში უსაფრთხოების ზომებზე უარის თქმის შედეგად დამდგარი ზიანისთვის პასუხისმგებელია მომხმარებელი.
- 7.5. მხარეები ვალდებული არიან, ამ მუხლით განსაზღვრული ვალდებულებების განზრახ ან დაუდევრობით შეუსრულებლობით გამოწვეული ზიანი აანაზღაურონ საქართველოს მოქმედი კანონმდებლობის შესაბამისად.

## **8. არაავტორიზებული ან არასწორად შესრულებული ოპერაციები**

- 8.1. არაავტორიზებულ ან არასწორად შესრულებულ ოპერაციებთან დაკავშირებული წესები განისაზღვრება საქართველოს კანონით “საგადახდო სისტემისა და საგადახდო მომსახურების შესახებ”.

## **9. ხელშეკრულებაში ცვლილებების შეტანა**

- 9.1. პროვაიდერი უფლებამოსილია, ნებისმიერ დროს შეიტანოს ცვლილებები წინამდებარე ხელშეკრულებაში. პროვაიდერი იღებს ვალდებულებას, მომხმარებლისთვის ხელმისაწვდომი გახადოს ხელშეკრულებაში შესატანი ცვლილებები მათ ამოქმედებამდე ერთი თვით ადრე შემდეგი ფორმით: შეცვლილი ხელშეკრულება გამოქვეყნდება პროვაიდერის ვებ-გვერდზე მომდევნო ვერსიის სახით, ხოლო მომხმარებელს გაეგზავნება შეტყობინება ხელშეკრულების შეცვლისა და მისი ახალი ვერსიის პროვაიდერის ვებ-გვერდზე ხელმისაწვდომობის თაობაზე.
- 9.2. ამ ხელშეკრულების 9.1 მუხლით გათვალისწინებული ვალდებულება არ ვრცელდება ისეთ შემთხვევაზე, როდესაც ხელშეკრულებას ემატება დებულებები ახალ საგადახდო მომსახურებაზე, რომელიც არ ანაცვლებს და/ან არ ცვლის ხელშეკრულებით გათვალისწინებულ საგადახდო მომსახურებებს.
- 9.3. ხელშეკრულების ცვლილებების ამოქმედებამდე, მომხმარებელს უფლება აქვს, დაგვეგმილი ცვლილებების თაობაზე პროვაიდერისგან შეტყობინების მიღებისთანავე ან ხელშეკრულების ცვლილებების ამოქმედებამდე, ნებისმიერ დროს, შეწყვიტოს ხელშეკრულება ყოველგვარი საკომისიოს, ხარჯისა და პირგასამტეხლოს გადახდის გარეშე. თავის მხრივ, ხელშეკრულების ცვლილებებზე მომხმარებლის უარის შემთხვევაში პროვაიდერი უფლებამოსილია, შეტყვიტოს

ხელშეკრულება ცვლილებების ამოქმედების თარიღზე. ამ მუხლის შესაბამისად ხელშეკრულების შეწყვეტის შესახებ მხარეებმა ერთმანეთს უნდა შეატყობინონ წერილობით.

9.4. პროვაიდერის მიერ შეთავაზებული ხელშეკრულების ცვლილებები ჩაითვლება მომხმარებლის მიერ დადასტურებულად, თუ ცვლილებების ამოქმედებამდე მომხმარებელი არ განუცხადებს წერილობით უარს პროვაიდერს შეთავაზებულ პირობებზე. მომხმარებლის დუმილი პროვაიდერის მიერ შეთავაზებულ ცვლილებებზე ჩაითვლება მომხმარებლის თანხმობად.

## 10. ხელშეკრულების ხანგრძლივობა და შეწყვეტა

10.1. წინამდებარე ხელშეკრულება იდება განუსაზღვრელი ვადით.

10.2. ხელშეკრულება შესაძლოა შეწყდეს ამ ხელშეკრულებით განსაზღვრული დებულებების შესაბამისად. ხელშეკრულების შეწყვეტა ავტომატურად იწვევს მომხმარებლის სახელზე გახსნილი ელექტრონული საფულის ანგარიშის გაუქმებასა და პროვაიდერის ყველა მომსახურების შეწყვეტას.

10.3. ხელშეკრულება შესაძლოა შეწყდეს:

10.3.1. მომხმარებლის მიერ, ნებისმიერ დროს, პროვაიდერისათვის წერილობითი შეტყობინების გაგზავნის გზით, რა შემთხვევაშიც პროვაიდერს უფლება აქვს, მოსთხოვოს მომხმარებელს გარკვეული დოკუმენტაციის წარმოდგენა ხელშეკრულების შეწყვეტის გაფორმებასა და დასრულებასთან დაკავშირებით;

10.3.2. პროვაიდერის მიერ, ნებისმიერ დროს, მომხმარებლისათვის წინასწარი წერილობითი შეტყობინების გაგზავნის გზით, რა შემთხვევაშიც შეწყვეტის შესახებ შეტყობინება მომხმარებელს უნდა გაეგზავნოს მინიმუმ 1 (ერთი) თვით ადრე;

10.3.3. პროვაიდერის მიერ, ნებისმიერ დროს, მომხმარებლისათვის წინასწარი წერილობითი შეტყობინების გაგზავნის გზით, თუ მომხმარებელი არღვევს წინამდებარე ხელშეკრულებით განსაზღვრულ რომელიმე ვალდებულებას ან პირობას და არ აღმოთხვრის დარღვევას პროვაიდერის გაფრთხილების მიუხედავად;

10.3.4. წინამდებარე ხელშეკრულებითა და მოქმედი კანონმდებლობით განსაზღვრულ შემთხვევებში.

10.4. ხელშეკრულების შეწყვეტის შემთხვევაში, საგადახდო მომსახურებისთვის რეგულარულად გადასახდელი საკომისიოს (ასეთის არსებობის შემთხვევაში) გადახდა უნდა მოხდეს მხოლოდ განუვლი საგადახდო მომსახურების პერიოდის პროპორციულად. თუ საგადახდო მომსახურების საკომისიო მომხმარებლის მიერ გადახდილია წინასწარ, მაშინ პროვაიდერი ვალდებულია მომხმარებელს აუნაზღაუროს ზედმეტად გადახდილი თანხა ხელშეკრულების შეწყვეტიდან 5 (ხუთი) სამუშაო დღის ვადაში.

## 11. მარეგულირებელი კანონმდებლობა და დავების გადაწყვეტა

11.1. წინამდებარე ხელშეკრულება რეგულირდება და განიმარტება საქართველოს კანონმდებლობით.

11.2. თუ მხარეთა შორის წარმოიშვა დავა ან უთანხმოება წინამდებარე ხელშეკრულებასთან დაკავშირებით ან მისგან გამომდინარე, მხარეები შეეცდებიან, დავა გადაჭრან მოლაპარაკებების გზით, ხოლო შეუთანხმებლობის შემთხვევაში, ნებისმიერ მხარეს უფლება აქვს მიმართოს თბილისის საქალაქო სასამართლო.

## 12. კომუნიკაცია

12.1. მხარეთა შორის სახელშეკრულებო ურთიერთობა განხორციელდება ქართულ ენაზე.

- 12.2. მომხმარებელს შეუძლია პროვაიდერთან კომუნიკაცია მოახდინოს პროვაიდერის ვებ-გვერდზე მითითებულ ტელეფონის ნომერზე (ცხელ ხაზზე) ან იმეილზე ან გაუგზავნოს წერილობითი შეტყობინება ფოსტით პროვაიდერის იურიდიულ მისამართზე.
- 12.3. პროვაიდერი მომხმარებელთან კომუნიკაციას მოახდენს მომხმარებლის პირად მობილურის ნომერზე, იმეილზე, მომხმარებლის ელექტრონული საფულის მართვის პანელში ან ფოსტით მომხმარებლის მისამართზე.
- 12.4. ელექტრონულ საფულეზე თანხების ჩარიცხვისა და განკარგვის ტრანზაქციების ისტორია განხორციელების დროების ზუსტი მითითებით ნებისმიერ დროს ხელმისაწვდომი იქნება მომხმარებლისთვის ელექტრონული საფულის მართვის პანელში.
- 12.5. მომხმარებელს უფლება აქვს, ხელშეკრულების მოქმედების მთელ პერიოდში, მოსთხოვოს პროვაიდერს და მიიღოს ნებისმიერი ინფორმაცია, რომლის მიღების უფლებაც მომხმარებელს გააჩნია “საგადახდო მომსახურების განხორციელებისას მომხმარებლისთვის აუცილებელი ინფორმაციის მიწოდების წესის დამტკიცების შესახებ” საქართველოს ეროვნული ბანკის პრეზიდენტის 2016 წლის 6 იანვრის #1/04 ბრძანებით, აღნიშნული ბრძანების მოქმედი ვერსიის ასლის ჩათვლით.